

SAOPŠTENJE ZA JAVNOST

u povodu sve češćih materijalnih šteta na području Grada Gračanica prouzrokovanih od strane divljih životinja – svinja

Svjedoci smo da je na području Grada Gračanica, a naročito na trebavskom dijelu Grada, konkretno MZ Lukavica, Prijeko Brdo, Trnovci, Džakule, Buk i Doborovci, u posljednjih nekoliko dana evidentirana masovna pojava nanošenja materijalne štete poljoprivrednicima, i to na njihovim parcelama zasijanim kukuruzom.

Nema sumnje da se radi o štetama koje su nastale od strane divljih svinja u potrazi za hranom. Suočeni sa ovakvom pojavom, vlasnici parcela, odnosno poljoprivrednici su između ostalog zatražili pomoć i od LD „Srndać“ Gračanica, pa LD „Srndać“ Gračanica u vezi ove pojave daje sljedeće saopštenje za javnost:

Članom 48. Zakona o lovstvu F BiH, korisnici lovišta, u ovom slučaju LD „Srndać“ Gračanica, gospodare lovištem na osnovu godišnjeg plana gospodarenja odobrenog od strane resornog kantonalnog ministarstva TK.

Prema tom planu, godišnji odstrel koji je odobren ovom društvu iznosi 21 jedinke divlje svinje, te svaki odstrel preko dozvoljenog broja povlači određenu odgovornost. Stoga, LD „Srndać“ Gračanica i nema zakonsku mogućnost da vrši odstrel divlje svinje, a naročito od 28.02.2020. godine, kao dana zatvaranja lova, pa do 01.11.2020. godine, kada zvanično počinje lov na divlju svinju.

Imajući u vidu takvu zakonsku formulaciju, obavještavamo korisnike poljoprivrednog zemljišta, koji imaju zasađene usjeve na zemljištu, da su dužni u skladu sa članom 68. Zakona o lovstvu F BiH, intenzivno preduzimati uobičajne mjere za sprječavanje šteta od divljači, i to:

- podizanjem ograda i slično,
- korištenjem raznih mehaničkih i fizičkih plašila (zvučna i vidljiva plašila- strašila),
- korištenje hemijskih sredstva koja odbijaju divljač od usjeva,
- te sudjelovanje u organizovanom progonu, s tim da ove mjere u vezi sa progonom propisuje kantonalni ministar.

U kontekstu naprijed navedenog i korisnik lovišta LD „Srndać“ Gračanica, dužan je preduzimati mjere za sprječavanje šteta koju divljač može učiniti imovini ili ljudima, i to na način da održava broj divljači prema kapacitetu lovišta, osigurava prehranu u lovištu, te postavlja čuvara i sl. Posebno napominjemo da smo već u nekoliko navrata na području Džakula izveli organizovane akcije na rastjerivanju te vrste divljači, a što ćemo također nastaviti i na ostalim ugroženim područjima.

Imajući u vidu sve naprijed navedeno, te da je ova pojava regulisana zakonom, LD će i dalje kontinuirano raditi na sprječavanju naprijed navedenih negativnih pojava, a u skladu sa zakonom, te će pokušati iznaći i druge načine zaštite ljudi i imovine kako bi dali svoj doprinos na suzbijanju ove pojave i eliminaciji šteta na poljoprivrednim usjevima, a naročito na usvajanju inicijative o povećanju broja odstrela divlje svinje.

LD „Srndać“ Gračanica